

sont Continuelement dans le danger, soit d'estre pris et bruslés a petit feu par leurs ennemis, soit de mourir de faim dans leurs voyages, et lors qu'ils sont a la Chasse; Ils ont entre eux coe vne tradition qui [il] leur faict Croyre que s'ils ont quelq⁹ vision ou plustost quelque reue, ils seront heureux a la Chasse et a la guerre et que deussent ils tomber entre les mains de leurs ennemis, ils s'en eschaperont. de la vient qu'ils sont atachés a Ces sortes de reues ou de visions coe a la vie: Les peres et meres esleuent a Cela leurs enfans des leur bas age, et ils les acoutument a faire. de longs Junes po⁹ se procurer des visions et po⁹ voir ou entendre quelque genie en dormant. Ils le font d'une maniere si exacte et si rigoureuse qu'ils demeurent 4 et 5 Jours et mesme dauantage sans manger n'y boire aucunement. Je ne scay si le diable s'aparoit a eux sous la forme de leurs pretendus genies, ou si leur cerueau vuide apres auoir [manger] esté si long temps sans manger leur en faict Imaginer quelqu'un; quoy qu'il en soit cette superstition faict vne peine extreme aux missionnaires et elle les empeche de baptiser le pluspart de ces peuples, dans la Crainte raisonnable qu'il n'y ayt en Cela quelque Chose de diabolique. Pour solidement establir le Christianisme nous n'en auons baptisé que quelques vns que nous auons conneu auoir quité toutes ces superstitions. vn de Ceux la ayant esté sollicité par son pere a Jeunner pour tacher a voir quelque genie, il le refusa disant qu'il estoit baptisé, qu'il Connoissoit le grand genie dont la robe noire leur parloit, et qu'il n'auoit besoin d'aucune autre diuinité, Et Comme son pere luy eut reproché qu'il seroit vn ho^e. de neant toute sa vie, il n'importe, luy repartit il ie seray grand Capitaine au Ciel, et Dieu me rendra heureux en me mettant au près de luy. L'on auoit diféré de baptiser le frere de ce feruent Chrestien par ce qu'il auoit de la peine, a ne se noircir pas